

Powšitkowne WOZJEWJENJA

njedźelu, 6. meje 2018

TCM přeprošuje na mejski nyšpor do Róžanta

Na našim serbskim hnadownym městnje w Róžeńće sławmy a prošmy mać Božu wo zastupnu próstwu pola jeje syna Jězu Chrysta za naš lud a kraj: zo bychmy dale žiwje wěрили do zrowastanjeného Chrystusa. Do paćerja chcemy tež wšu swětowu cyrkej zapřijeć a so wo měr na zemi modlić.

W tutym zmysle přeprošuju w mjenje Towarstwa Cyrila a Metoda z.t. (TCM) wěriwych ze wšitkich wosadow njedźelu, 6. meje, w 17.00 hodź. na wosebity mejski nyšpor do hnadowneje cyrkwy w Róžeńće. Chróšćanski cyrkwinski chór jón hudźbnje wobrubu.

Jurij Špitank, předsyda TCM

Serb dóstanje měšniku swjećiznu

Biskop Heinrich Timmerevers wudźěli sobotu, 19. meje, w 10 hodź. na Božej mši w Drježdžanskej katedrali dwěmaj diakonomaj měšniku swjećiznu. Jedyn z njeju je dr. Jens Buliš z Chróšćic. Wšitcy wěriwi su na tutu Božu mšu přeprošeni a měli so za njeju kaž tež powšitkownje wo duchowny dorost modlić.

Swoju primicu změje dr. Jens Buliš swjatkwoničku, 20. meje, w 9 hodź. w Chróšćanskej cyrkwi.

Duchowna hudźba

Prěni lětuši koncert w rjedže Duchowna hudźba w Budyskej tachantskej cyrkwi swjateho Pětra budže tutu njedźelu, 6. meje, we 18 hodź. Zahudža dujerjo Bratrowskeje wosady z Małeho Wjelkowa pod nawodom Siegfrieda Schneidera, na piščelach zahraje cyrkwinskohudźbny direktor Friedemann Böhme.

Wšitcy su wutrobnje přeprošeni, zastup je darmotny.

Putnikowanje staršich a chorych ludźi do Róžanta

Putnikowanje staršich a chorych ludźi ze serbskich wosadow do Róžanta budže sobotu, 12. meje. Wot 13 hodź. budže přiležnosć k swjatej spowědźi. Modlenje swjateho róžowca započnje so w 13.30 hodź. Róžowcej přizamknje so w 14 hodź. Boža mša, kotruž změje farar Gabriš Nawka. Na njej wudźěli so tym, kotřiž sej to přeja, žalbowanje chorych. Po kemšach poskići so swačina.

Ministrantska kopańca

Dekanatne dušepastyrstwo přeprošuje ministrantow ze serbskich wosadow na koparski turněr. Tutón wotměje so wutoru, 22. meje, w Pěskecach. Započatk budže w 9.00 hodź. z Božej mšu we wjesnej kapałce. Mustwa měli so hač do wutory, 15. meje, pod worklecy-kise@gmx.de abo pod telefonowym čisłom (03 57 96) 88 707 přizjewić. Hraje so małym polu we wobsadce 7:1.

Putnikowanje młodžiny

serbska dekanatna młodžina změje swoje lětuše putnikowanje njedźelu, 27. meje. Młodostni zetkaja so w 9 hodź. we Worklečanskej kapalce. W 9.15 hodź. woteńdu zhromadnje w procesionje do Różanta. Boža mša z chórom a hudźbnikami budže w 10.30 hodź. w hnadownej cyrkwi. Po kemšach nawróca so młodostni w procesionje do Worklec, hdžež budže w Don Boskowym domje wobjed. Za putnikowanje zwučuje chór hišće raz sobotu, 12. meje, wot 10 do 12 hodź. w Chróścicach na farje.

Džělowej městnje w Radworju

W Katolskim serbskim džěćacym domje „Alojs Andricki“ w Radworju, kotryž je w nošerstwje katolskeje wosady Marije kralowny różowca, pytaja wot 1. awgusta kublarja abo kublarku, tež tajkich, kotřiž móhli so k tomu připódla skwalifikować. Nimo toho ma so 1. decembra městno nawody abo nawodnicy tutoho džěćaceho domu wobsadzić. Nadrobne wupisanje k tomu nańdu zajimcy pod www.posol.de.

Putnikowanje do Armenskeje a Georgiskeje

Za putniku jězbu z lětađom wot wutory, 12. junija, do njedźele, 24. junija, do Georgiskeje a Armenskeje su hišće někotre městna swobodne. Zajimcy měli so hač do njedźele, 13. meje, pola Maćija Hadanka w Hórkach, Sydlišćowu puć 2, přizjewić, telefonowej čisle (01 63) 7 33 82 05 abo (03 57 96) 9 54 28 (po 19 hodź.).